

आकाशवाणी

खबरां

1. प्रधानमंत्री नरेंद्र मोदी होरें आखेआ जे देस चमड़ी दे रंग दे आधार पर लोके दे अपमान गी बर्दाश्त नेई करोग।
2. भारतीय जनता पार्टी नै कांग्रेस नेता सैम पिट्रोडा हुंदे आस्सेआ भारतीयें पर टिप्पणी करने दी नुक्ताचीनी कीती ऐ।
3. लोकसभा चुनाएं दे 5में गेड़ तैहत 6 राज्यें ते द'ऊं केंद्र शासित प्रदेशें च 20 मई गी होने आहले मतदान लेई 695 मेदवार चुनांस मैदान च न।
4. केंद्री जांच ब्यूरो नै रूसी सेना च लडाकू भूमिकाएं लेई भारतीय नागरिकें दी तस्करी सरबंधी मामले च 4 आरोपिं गी गिरफ्तार कीता ऐ।
5. भारती मौसम विभाग नै राजस्थान ते मध्य प्रदेश च इस म्हीने दी 10 तरीक तगर लू चलने दे इक नमें दौर दी शुरूआत दी भविष्यणी कीती ऐ।

<><><><><><>

PM-Rally

प्रधानमंत्री ते भारतीय जनता पार्टी दे वरिष्ठ नेता नरेंद्र मोदी होरे आखेआ ऐ जे मुख्य चमड़ी दे रंग दे आधार पर लोके दा अपमान बर्दाश्त नेई करोग। तेलंगाना दे वारंगल च इक जनसभा गी संबोधित करदे होई मोदी होरें साबका प्रधानमंत्री पी.वी नृसिम्हा राव होरें गी लेइए बी कांग्रेस पर हमला कीता। उनें आखेआ जे भारतीय जनता पार्टी दी नीति रेई ऐ जे मुख्य पैहले ऐ, जिसले जे कांग्रेस ते बी.आर.एस जनेई पार्टिं आस्तै परौआर सब्बनें थवां पैहले ऐ। परौआर गी पैहले रक्खने आली नीति करी कांग्रेस नै पी.वी नृसिम्हा राव हुंदा अपमान कीता जिसले कि एनडीए नै उनेंगी सम्मान दिंदे होई उनेंगी भारत रत्न दित्ता। प्रधानमंत्री होरें लोके सोयां विकास ते तेलंगाना दे हितें गी नुकसान पजाने आलें गी करारा जवाब देने आस्तै वोट देने दी अपील कीती। उनें आरोप लाया जे कांग्रेस सरकार कालेश्वरम सिंचाई परियोजना घोटाले च शामिल बीआरएस कार्यकर्तां गी संरक्षण देआ रदी ऐ। मोदी होरें आरोप लाया जे जित्थे बी कांग्रेस ते इंडी गठबंधन दे सहयोगी सरकार बना रदे न उथे उनें राज्यें गी एटीएम बनाई दित्ता ऐ। उनें दस्सेआ जे किस चाल्ली झारखंड च कांग्रेस दे इक सांसद कश 300 करोड़ रपे दे नोटें दा पहाड़ पाया गेआ। उनें आखेआ जे तेलंगाना च कांग्रेस सरकार नै राज्य दा खजाना खाली करी दित्ता ते विकास दे सारे कम्म रोक्की दित्ते न।

<><><><><><>

BJP-INC

भारत जनता पार्टी नै अज्ज कांग्रेस नेता सैम पिट्रोडा दी भारतीयें पर कथित तौर पर आपत्तिजनक टिप्पणी पर नुक्ताचीनी कीती ऐ। नमीं दिल्ली च मीडिया गी जानकारी दिंदे होई पार्टी दे प्रवक्ता सुधांशु त्रिवेदी होरें आखेआ जे पितरौदा होरें भारत दी संस्कृति ते पंछान दे कन्नोकत्री देसा दे लोके गी बी बेइज्जत कीता ऐ। उनें आखेआ जे जियां-जियां लोकसभा चुनां अग्गे बधदे जा करदे न, कांग्रेस बेनकाब होआ रदी ऐ। त्रिवेदी होरें दोष लाया जे कांग्रेस दी पूरी विचारधारा, लोके गी बंडुने दी ऐ। पार्टी दे नेता ते केंद्रीय मंत्री राजीव चंद्रशेखर होरें दोष लाया ऐ जे पितरौदा हुंदी इस टिप्पणी कन्नै कांग्रेस दी मानसिकता दा पता लगदा ऐ। इस थमां पैहले पितरौदा होरें देसा दे बक्ख-बक्ख हिस्सें दे भारतीयें दी तुलना चीनी, अफ्रीकी, अरब ते गोरे

कन्नै कीती ही। अआं कांग्रेस नै पितरौड़ा हुंदी टिप्पणी थमां अपने आप गी दूर करी लैता ऐ ते आखेआ ऐ जे भारत दी विविधता गी दस्सने लेई उंदे आस्सेआ आक्खी गेदी गल्लां सारें शा मंदें भागें आली ते नाकाबिले बर्दाश्त ना। सोशल मीडिया पर इक पोस्ट च पार्टी महासचिव जयराम रमेश होरें आखेआ जे कांग्रेस इस चाल्ली दी सोच थमां पूरी चाल्ली दूरी रखदी ऐ।

<><><><><><>

### ECI 5<sup>th</sup> Phase

लोकसभा चुनाएं दे 5में गेड़ च 6 राज्यें ते दऊं केंद्र शासित प्रदेशें दे 49 संसदीय क्षेत्रें लेई कुल 695 मेदवार चुनां मैदान च ना। इनें संसदीय क्षेत्रें लेई कुल 1 ज्हार 586 नामांकन पत्र दाखल कीते गे न जेडे 20 मई गी चुनां लेई जा करदे ना। नामांकन दाखल करने दी अखीर तरीक इस म्हीने दी त्रै तरीक ही ते कागत पत्रें दी जांच मगरा 749 नामांकन सेही पाये गए ना। 5में गेड़ च 20 मई गी उत्तर प्रदेश च 14 लोकसभा सीटें, पच्छिम बंगाल च 7 सीटें, बिहार ते ओडिशा च 5-5 लोकसभा सीटें, झारखंड च त्रै सीटें, जम्मू-कश्मीर ते लद्दाख दी इक लोकसभा सीट पर वोट पाए जाने ना।

<><><><><><>

### Voter Turnout

लोकसभा चुनाएं दे त्रीए गेड़ तैहत कल वोट पाए गए। इस दौरान 64 अशारिया 58 फीसद मतदान दर्ज कीता गेआ। त्रीए गेड़ तैहत 10 राज्यें ते इक केंद्र शासित प्रदेश दी 93 लोकसभा सीटें लेई वोट पाए गए। मतदान शांतिपूर्ण सम्पन्न होई गेआ। मुख्य दे मते सारे हिस्सें च बड़ी मती गर्मी दे बावजूद खरी मती गिनतरी च लोकें वोट पाने दे अपने हक्क दा इस्तेमाल कीता।

<><><><><><>

### CBI-Arrests

केंद्री जांच ब्यूरो नै रूसी सेना च लडाकू भूमिकाएं लेई भारतीय नागरिकें दी तस्करी कन्नै जुडे दे इक्क मामले च चार आरोपिएं गी गिरफ्तार कीता ऐ। सीबीआई नै आखेआ ऐ जे उनें विदेशें च फायदेमंद नौकरिएं दे बदाने, देसा च चलने आहले इक बड्डे मनुक्खें तस्करी सरबंधी नेटवर्क दा पर्दाफाश करी दित्ता ऐ जेदे च भोले भाले युवाएं गी नशाना बनाया जंदा ऐ। इस मामले च सीबीआई नै केरल दे रौहने आहले दऊं आरोपिएं ते मुम्बई दे रौहने आहले दऊं होर आरोपिएं गी गिरफ्तार कीता ऐ। एजेंसी नै आखेआ ऐ जे तस्कर सोशल मीडिया प्लेटफार्में ते उंदे मुकामी एजेंटें दे राएं भारतीय नागरिकें गी रूस च मती मजदूरी आहली नौकरिएं लेई लुभाने लेई इक संगठित नेटवर्क दे तौरा पर कम्म करा करदे ना।

<><><><><><>

### Sitharaman-Rahul Gandhi

केंद्री खजाना मंत्री ते भारतीय जनता पार्टी दिआं सीनियर लीडर निर्मला सीतारमण होरें अज्ज सार्वजनिक क्षेत्र दे उपक्रमें यानि पी.एस.यू.स गी तबाह करने ते उत्थे अव्यवस्था कायम करने सरबंधी कांग्रेस नेता राहुल गांधी हुंदे आस्सेया लाए गेदे दोषें गी खारिज करी दित्ता। राहुल गांधी हुंदे दोष लाने दे परते च श्रीमति सीतारमण होरें सोशल मीडिया पोस्ट च दावा बन्नेआ जे सार्वजनिक क्षेत्र दे उपक्रम नरेंद्र मोदी सरकार च बदा मठोआ करदे ना। उनें दोष लाया जे कांग्रेस दे अगुवाई आहली यूपीए सरकार च सार्वजनिक क्षेत्र दे उपक्रमें दी हालत माड़ी गै रेयी। सीतारमण होरें दावा बन्नेया जे पूंजी खर्च पर मौजूदा सरकार दे ध्यान देने कन्नै उन्दे स्टाक प्रदर्शन च बी बाहा होआ ऐ। सीतारमण होरें इब्बी आखेआ जे शिडक, बिजली, धातु, निर्माण, भारती उपकरणें दे निर्माण ते होर क्षेत्र च बुनियादी ढांचे दे विकासख् बिजली ते सरबंधत साजो-समेयान पर सरकार दे ध्यान देने कन्नै सार्वजनिक क्षेत्र दे उपक्रमें गी सिद्धरे तौरा पर फायदा होआ ऐ।

<><><><><><>

## Thalasemai-Day

थैलेसीमिया दी रोकथाम ते इलाज दे बारे च लोकें च जागरूकता बदाने लेई अज्ज विश्व थैलेसीमिया ध्याडा मनाया जा करदा ऐ। एहू रोग उल्लै हुंदा ऐ जेल्ले शरीर, लोडचदा खून बनाने च असमर्थ हुंदा ऐ। इस ध्याडे दा मकसद इस रोग कन्नै प्रभावित लोकं गी समर्थन देने लेई अनुवांशिक परीक्षण दे महत्व पर जोर देना ते सब्बनें लेई इक्को नेआ ते म्यारी ईलाज तगर पुज्ज दी वकालत करना ऐ।

<><><><><><>

## World Red Cross Day

विश्व रेड क्रॉस ते Red Crescent दिवस अज्ज मनाया जा रदा ऐ। एहू दिन स्वयंसेविणं, लक्खां बद्दे कर्मचारिणं दे कम्मं गी मान देने आस्ते मनाया जंदा ऐ। एहू दिन हर बरे 8 मई गी अंतरराष्ट्री रेड क्रॉस ते रेड Red Crescent आंदोलन दी विचारधारा ते मनुक्खी आधार पर कीते गेदे कम्मं प्रति सम्मान दे तौर पर मनाया जंदा ऐ। Henry Dunant इक अग्रणी स्विस स्वयंसेवक हे जिनें लगभग 160 बरे पैहलें अंतरराष्ट्रीय रेड क्रॉस ते रेड Red Crescent अभियान दी शुरूआत कीती ही।

<><><><><><>

## WRCD-Jammu

विश्व रेड क्रॉस ध्याडे दे मौके पर जम्मू दे टीचर भवन च भारतीय रेड क्रॉस सोसायटी आस्सेआ रक्तदान कैंप लोआया गेआ। इस रक्तदान कैंप दा उद्घाटन जम्मू दे डिप्टी कश्मिनर सचिन कुमार वैश्य होरें कीता। ओहू जिला रेड क्रॉस सोसायटी जम्मू दे चेयरमैन बी हैना। डिप्टी कमिशनर जम्मू होरें समारोह च रेड क्रॉस दा झंडा फहराया। इस मौके पर प्रोग्राम च शामिल होने आहलें गी रेड क्रॉस दी सगंध बी चकाई गेई। दर्जनां लोकें कैंप च रक्तदान कीता। डिप्टी कमिशनर जम्मू सचिन कुमार वैश्य होरें इस मौके पर बोलदे होई आखेआ जे हर जगह पर रेड क्रॉस दा बड्डा योगदान ऐ कीजे पैहले रेड क्रॉस दा मेडिकल क्षेत्र च योगदान हा उवां हुन रेड क्रॉस दे स्वयंसेवी हर कुतै जरूरतमंद दी सहायता करदे न ते अपना योगदान दिंदे ना।

<><><><><><>

## IMD-Weather

भारतीय मौसम विभाग नै इस म्हीने दी 10 तरीक तगर राजस्थान दे मध्य प्रदेश च लू चलने दे इक नमें दौर दी शुरूआत दी भविक्खवाणी कीती ऐ। मौसम विभाग नै अगगे आखेआ ऐ जे गर्मी ते गुम्मे आहला मौसम अगले दऊं दिनें तगर पुडुचेरी च बने दा रौहगा ते तटीय गुजरात च बी इस्सै चाल्ली हालात दिक्खने गी थ्होई सकदे ना। एजेसी नै इस म्हीने दी 11 तरीक तगर उत्तर पूर्वी भारत च हल्के थमां दरम्याने दर्जे दी बरखा कन्नै अही झक्खड़ चलने दी संभावना जताई ऐ।

<><><><><><>